

morir avanti che lassar, la corsi a la pruova, et montato sopra li paretoli con una lanza longa ne passai do de mia mano. Questa veramente mi era forzo, perchè era solo. A la prima, mi fo ferito el paron de una lanza in l'ochio, et li fo forzo andar a basso; et soto la pupa da freza, in el fianco, fu ferio el comito. Et cussi diti spale, che l'albanese, el Rizo et un galeoto montono sopra la fusta, et fomi tajato la lanza, e toltone una altra. Nel scuoder la lanza, fomi dato da uno turco una lanza su la cossa destra; ma poco mi pasò, et de uno legno nel volto, che mi rompe tuti li labri per l'urto mi deteno su li denti, *adeo* aziò non fusse visto sanguinato, vi juro a Dio che ingiotti 10 bochonade de sangue. De sasade non ve digo, che tutta la vita ho rota et deschinada; *adeo* che visto, tuti nostri montono sopra, et li tajasemo che non è scapolà niuno, excepto certi schiavi christiani, che pono esser da 5. Et tolta la fusta per pupa, deliberai andar dove el vento me segondava, qual se mise al sirocco, et vini a la volta di si per restaurar li feriti, come anche per bisogno de pan; che se non fusse stato uno poco ne trovassemo su la fusta, convenivemo star dezuni. Sichè la bataja durò per spazio di ore 7 in 8 senza manzar, ni beber, et tutti stete sopra di me solo; ma ben vi zuro, per Dio imortal, che talor, per veder la cosa dubiosa, chiamava la morte. Vi vojo dir uno miracolo, che ne le braze ho auto 20 frezade, e non havea brazaleti, le qual solo mi hanno ponto, nè mi hanno pasato da conto. Li morti de la fusta, è stato el Moro, qual da tre schiopetade al secondo desserar morì, et turchi et cativi christiani numero 230 *vel* zercha. Io non ho avuto altro di quella vitoria se non bandiere, nacare, et una pistoiese dil Moro e li sui vestimenti, qual vojo tenir per memoria. La fusta era nuova, perchè non era 4 zorni la era ussita, nè havea fato presa niuna; et quelli erano montadi da Durazo, non erano montadi se non con le arme sole; sichè non havemo avadagnato se non le ferite.

160

De li mei de la galia, ne è stati morti 7, tra li qual Beneto Galo di uno schiopeto, uno altro di spadaza su la fusta, uno di schiopo, uno altro de schiopo et tre galioti da frezade, de li qual uno casete in acqua armado et se anegò. De feridi, numero 93, de li qual forte feridi ne son da 10. El paron ha perso l'ochio, et el vechio bombardier cargando la bombarda, d'un arcobuso che gli passò la cosa e li ha scavezà l'osso, et alcuni altri galioti; ma el resto son feride di poco momento. Vi ho voluto narar tutto el successo del conflitto, che 'l è aponto così come se fossi stato presente. Io menai la fusta in Anti-

vari et apicai el comito, che era christiano et lo brusai. Apresto, ne son molti si hanno portato valentissimamente in questo conflitto. De li schiavi che ho recuperato, tra gli altri è uno marangon, qual stava in caxa con el Moro, dal qual ho auto el Moro con questa fusta esser fuzito una note de la Valona senza licentia di chadi, nè vayvoda; questo perchè el fo avisato di uno comandamento venia da la Porta per retenirlo, però se ne ha fuzito; qual non voleva più ritornar a la Valona, ma andar a star a l'Arta, per farsi far una galia

Fu posto, per li Savii ai ordeni, non era sier Fantin Zorzi, do galie al viazo di Baruto con don ducati 500 di Avogadori extraordinarii, ducati 500 de le Cazude, ducati 500 di X Officii, con li modi soliti. Habino a meter banco a di primo Luio e confinà il Capitano per tutto Luio; parti 3 di et la muda per tutto 10 Octubrio, con altre clausule, *ut in parte*; fu presa. Ave 174, 3. 161

Fu posto, per sier Marin Justinian et sier Zuan Francesco Mozenigo savii ai ordeni, che le galie di Barbaria poste se intendi il cargar di le specie come si observa in Levante, secondo la forma de le leze che forestieri non possino cargar dite specie; *in reliquas* star sopra l'incanto preso a di 18 de l'istante.

A l'incontro, sier Zuan Contarini, sier Piero Vemier savii ai ordeni, sier Zuan Dollin, sier Hironimo Querini, sier Michiel Morexini provedadori sora la Mercadantia, che dito incanto sia reformato, *videlicet* che nel cargar specie si osservi la istessa forma de le galie di Levante, e dil nolo pagi ducati 5 per mier di nolo specie grosse, de le menude ducati 6 dil mier sotil. *Item*, sia preso, dove fu posto do galie, siano tre galie, habi di don ducati 5000 per galia, *videlicet* 1000 di l'officio di le Cazude, 1500 di Avogadori extraordinarii, 1500 di tre Provedadori sora i Offici, non intendendo li debitori di sali, ni mità dil neto, ducati 500 di X Offici et . . . , come in l'incanto se contien; et se possi prevaler di diti danari dato harano de loro piezarie, qual siano aprobate per el Colegio nostro; debino far el deposito a di 15 Marzo, et el Capitano elezer si debi nel nostro Mazar Consejo per 4 man di eletion et habi salario, preheminentie, e utilità e jurisdiction e tessere come hano li Capitani di le galie di Fiandra etc. Andò le parte: una non sincere, 5 di no, 43 di do Savii ai ordeni, 142 questa di sier Zuan Contarini e altri nominati, et fu presa; ma non trovano dite galie Patroni, come dirò di soto.